



Adresa: **Ul. Hamdije Čemerlića 39a**  
71000 Sarajevo  
<http://www.voda.ba>

tel. +387 33 726 400  
fax. +387 33 726 423  
e – mail: [info@voda.ba](mailto:info@voda.ba)

Broj: **UP-1/21-3-40-068-4/22**  
Datum: **10.03.2022. godine**

«Agencija za vodno područje rijeke Save» Sarajevo rješavajući po zahtjevu pravnog lica "HIFA-PETROL" d.o.o. Sarajevo, za donošenje rješenja o vodnoj dozvoli za ispuštanje oborinskih onečišćenih voda sa lokacije benzinske pumpne stanice sa pratećim sadržajima, PJ Živinice 2, izgrađene u naselju Litva, Živinice, na osnovu člana 109. stav (1) Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98 i 49/99), donosi:

### **RJEŠENJE** **o vodnoj dozvoli**

1. Pravnom licu "HIFA-PETROL" d.o.o. Sarajevo PJ Živinice 2, daje se vodna dozvola za ispuštanje oborinskih onečišćenih voda sa lokacije benzinske pumpne stanice sa pratećim sadržajima, PJ Živinice 2, izgrađene u naselju Litva, Živinice, na zemljištu označenom kao k.č. br. 3662 i 3663 K.O. Živinice Grad.
  2. Ova vodna dozvola ne oslobađa podnosioca zahtjeva obaveze pribavljanja saglasnosti i dozvola, od strane drugih nadležnih organa, a sve u skladu sa važećim zakonskim propisima, odlukama i dr.
  3. Vodna dozvola se daje na osnovu činjeničnog stanja utvrđenog pregledom dostavljene dokumentacije i izvršenim uviđajem na objektu, pod slijedećim uslovima:
    - 3.1. Da pravno lice "HIFA-PETROL" d.o.o. Sarajevo, obezbijedi da se sistem za prikupljanje, prečišćavanje i ispuštanje otpadnih voda kao i objekti izgrađeni u krugu benzinske stanice sa pratećim sadržajima u naselju Litva, Živinice, održavaju u funkcionalnom stanju i koriste u skladu sa namjenom i uslovima iz ove vodne dozvole.
    - 3.2. Da se na prostoru gdje se vrši pretakanje naftnih derivata u rezervoare izvrše radovi na način da se omogući prikupljanje oborinskih onečišćenih voda i iste spoje sa ostalim vodama sa premetne lokacije i odvedu na tretman u separator naftnih derivata.
    - 3.3. Čišćenje separatora i pratećih elemenata, te odvoz i konačno zbrinjavanje otpadnog mulja i taloga, kao i opasnog otpada sa lokacije predmetne benzinske pumpe može vršiti isključivo firma ovlaštena za tu vrstu djelatnosti, prema sklopljenom ugovoru. O načinu i vremenu radova održavanja, odnosno o pražnjenju, odvozu i zbrinjavanju sadržaja taložnika i separatora ulja i masti, neophodno je voditi službenu evidenciju i arhivu.
    - 3.4. U toku važenja ovog Rješenja, korisnik predmetnih objekata je obavezan poduzeti sve potrebne mjere kako bi kvalitet oborinskih onečišćenih voda, a prije ispuštanja u recipijent, zadovoljio granične vrijednosti u skladu sa članom 14. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj: 26/20 i 96/20).
    - 3.5. Korisnik objekta je dužan, putem laboratorije ovlaštene od strane Federalnog ministarstva poljoprivrede, vodoprivrede i šumarstva, vršiti redovna ispitivanja kvaliteta otpadnih voda, uzimanjem uzorka efluenta iz okna za monitoring u skladu sa članom 19. stav (4) Uredbe o uslovima ispuštanja otpadnih voda u okoliš i sisteme javne. Učestalost i način ispitivanja vršiti u skladu sa članom 20. Uredbe o uslovima ispuštanja otpadnih voda u okoliš i sisteme javne kanalizacije. Rezultate analiza dostaviti ovoj Agenciji.
- Izveštaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i šumarstva po

- osnovu člana 64. stav (3) Zakona o vodama i Pravilnika o uslovima koje moraju ispunjavati referentne odnosno ovlaštene laboratorije za ispitivanje voda, sadržaj i način davanja ovlasti («Službene novine Federacije BiH», broj 14/10, 14/13, 26/14, 23/17 i 41/20).
- 3.6. Da se skladištenje nafte i naftnih derivata vrši u podzemnim dvoplašnim rezervoarima ukupne zapremine  $V=160 \text{ m}^3$  ( $2 \times 40 + 2 \times 40 \text{ m}^3$ ).
  - 3.7. Skladištenje i pretakanje nafte i naftnih derivata kao i ispitivanje ispravnosti i propusnosti rezervoara za skladištenje goriva vršiti u skladu sa Zakonom o naftnim derivatima u Federaciji Bosne i Hercegovine (Službene novine Federacije BiH br. 52/14) i propisima iz ove oblasti, a na način da se spriječe dospijevanje nafte i naftnih derivata u podzemne i površinske vode.
  - 3.8. Sadržaj (mulj) iz uređaja za prečišćavanje otpadnih voda i ostali otpad ne smije se odlagati na česticu «vodno dobro», odnosno u vodotoke i na njegove obale.
  - 3.9. Na predmetnoj lokaciji nije dozvoljeno indirektno ispuštanje otpadnih voda u podzemne vode.
  - 3.10. Da se u skladu sa propisima iz oblasti zaštite okoliša vrši bezbjedno skladištenje i postupanje sa opasnim materijama i otpadom nastalim na predmetnom lokalitetu (adekvatnim mjerama onemogućiti bilo kakvo isticanje i rasipanje opasnih i štetnih materija na tlo i u vode).
  - 3.11. Osigurati priručna sredstva za brzu intervenciju u slučaju nekontrolisanog istjecanja nafte i naftnih derivata, kako bi se spriječilo moguće onečišćenje voda i tla (piljevina, prikladni apsorbenzi, odgovarajuće posude, uređaji za pretakanje i sl.).
  - 3.12. Investitor je obavezan pridržavati se svih mjera i uslova propisanih u saglasnostima i dozvolama, izdatim od strane drugih nadležnih organa, a odnose se na korištenje i zaštitu voda i nisu u suprotnosti sa uslovima iz ove vodne dozvole.
4. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama („Službene novine Federacije BiH“, broj 70/06) i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada („Službene novine Federacije BiH“, broj 92/07, 46/09, 79/11, 88/12 i 03/16), Prilog 1. Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
  5. U periodu važenja ove dozvole, Korisnik je dužan provoditi sve mjere i aktivnosti propisane istom.
  6. Ukoliko radom predmetnog objekta dođe do šteta ma kakvog karaktera, korisnik vodne dozvole je dužan uzroke nastalih šteta otkloniti, a nastale štete trećim licima nadoknaditi.
  7. U slučaju izvanrednih situacija, havarijskih onečišćenja i drugih sličnih okolnosti, čime bi bio ugrožen kvalitet podzemnih i površinskih voda, korisnik objekta obavezan je izvijestiti nadležne organe i izvršiti izvanredna postupanja po nalogu nadležnih organa, te o vlastitom trošku uzroke štete otkloniti, a nastale štete nadoknaditi.
  8. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na objektima predmetnog objekta benzinske pumpe sa pratećim sadržajima obuhvaćenim ovom vodnom dozvolom, korisnik zaštitnih vodnih objekata nije odgovoran za nastale štete.
  9. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
  10. Ova vodna dozvola, shodno članu članu 117. stav (1) Zakona o vodama se daje sa rokom važenja od 5 (pet) godina od dana pravosnažnosti ovog rješenja.
  11. Prije isteka važnosti ove dozvole, Investitor je dužan da podnese zahtjev za izdavanje nove vodne dozvole.
  12. Ova vodna dozvola može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev.

## Obrazloženje

Pravno lice "HIFA-PETROL" d.o.o. Sarajevo, zahtjevom broj: 2-INV/22 od 14.02.2022 godine se obratilo ovoj Agenciji za donošenje rješenja o vodnoj dozvoli za ispuštanje oborinskih onečišćenih voda sa lokacije benzinske pumpne stanice sa pratećim sadržajima, PJ Živinice 2, izgrađene u naselju Litva, Živinice, na zemljištu označenom kao k.č. br. 3662 i 3663 K.O. Živinice Grad.

U provedenom postupku dostavljena je i pregledana sljedeća dokumentacija:

### A. Opšta dokumentacija

- Aktuelni izvod iz sudskog registra broj: 065-0-RegZ-21-011511 od 15.12.2021. godine, izdat od strane Osnovnog suda u Sarajevo-ovjerena kopija,
- Ovjerena kopija Uvjerenja o poreskoj registraciji, od 23.02.2005.godine, izdatog od strane Porezna uprava-Kantonadni ured Sarajevo,
- Kopija uplatnice administrativne takse i biljega,
- Ovjerena kopija Uvjerenja o registraciji/upisu u Jedinostveni registar obveznika neizravnih poreza broj: 04/1-UPP/1-16499/07 od 06.09.2007. godine, izdatog od strane Uprave za indirektno-neizravno oporezivanje Banja Luka,
- Rješenje o vodnoj dozvoli broj: UPI-25-3-40-735-4/15 od 02.03.2016. godine izdato od strane «Agencije za vodno područje rijeke Save» Sarajevo,
- Rješenje o izmjeni rješenja o vodnoj dozvoli broj: UPI-25-3-40-735-6/15 od 01.09.2020. godine izdato od strane «Agencije za vodno područje rijeke Save» Sarajevo,
- Rješenje o vodnoj dozvoli broj: 04/1-13-21-26296/20 od 03.02.2021 godine izdato od strane Ministarstva poljoprivrede, šumarstva i vodoprivrede Tuzlanskog kantona,
- Izvještaj o monitoringu kvaliteta i kvantiteta otpadnih voda urađen od strane „TQM“ d.o.o. Lukavac, novembar 2021 godine,
- Ovjereni prepis Izvornik OPU-OV 2526/2020 Ugovora o podzakupu nekretnina i opreme benzinskog terminala, zaključen dana 15.06.2020 godine kod Notara Jusufa Halilovića sa službenim sjedištem u Živinicama,
- Radni zapisnik o radovima na pranju i čišćenju separatora od 23.07.2022 godine od strane „DELTAPETROL“ d.o.o. Kakanj,
- Prijepis katastarsko-knjižnog uloška broj 1027 broj: 05-26-136/22-3 od 16.02.2022 godine od strane Službe za urbanizam, geodeske i imovinskopravne poslove, Općina Banovići,

### B. Tehnička dokumentacija

- Glavni projekat benzinske pumpne stanice „ŠKALJIĆ“ d.o.o. Živinice, urađen od strane „DŽEVCOMERC PPROJEKTING“ Zavidovići, april 2000. godine (uvid prilikom uviđaja)

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u ovoj upravnoj stvari i u skladu sa članom 12. stav (5) i (6) Pravilnika o sadržaju, obliku, uvjetima, načinu izdavanja i čuvanja vodnih akata («Službene novine Federacije BiH», br. 31/15, 55/19 i 41/20), izvršen je obilazak predmetne lokacije i tom prilikom sačinjen zapisnik o uviđaju broj: UP-1/21-3-40-068-2/22 od 04.03.2022. godine.

Uvidom u dostavljenu dokumentaciju i izvršenim uviđajem na licu mjesta može se konstatovati sljedeće:

Lokacija izgrađenog predmetnog poslovnog objekta se nalazi u Litva, Živinice, na zemljištu označenom kao k.č. br. 3662 i 3663 K.O. Živinice Grad.

Podnosilac zahtjeva aktivnost obavlja u zakupljenom poslovnom objektu a prema prepisu Izvornika OPU-OV 2526/2020 Ugovora o podzakupu nekretnina i opreme benzinskog terminala, zaključen dana 15.06.2020 godine kod Notara Jusufa Halilovića sa službenim sjedištem u Živinicama.

U sklopu benzinske stanice nalaze se sljedeći sadržaji: administrativne prostorije sa sanitarnim čvorom, prodajni prostor, magacin, nadstrešnica za agregate za istakanje goriva, četiri dvoplašna rezervoara za skladištenje goriva, separator masti i ulja, manipulativni površine i parking prostor.

Skladištenje nafte i naftnih derivata vrši u podzemnim dvoplašnim rezervoarima za tečna goriva ukupne zapremine 160 m<sup>3</sup> (2x40+2x40 m<sup>3</sup>).

Oborinske onečišćene vode na izlazu iz kruga benzinske stanice se preko linijskih rešetki prikupljaju te potom odvođe u separator ulja i masti a potom ispuštaju u postojeći kanalizacioni sistem na predmetnoj lokaciji.

Zbrinjavanje opasnog otpada se vrši od strane ovlaštene firme prema sklopljenom ugovoru.

Na osnovu dostavljene dokumentacije i uviđaja izvršenog na predmetnoj lokaciji, a u svrhu smanjenja negativnih uticaja predmetnog objekta na stanje voda i vodni režim, podnosiocu zahtjeva su ovom vodnom dozvolom u tački 3. dispozitiva Rješenja propisani uslovi u skladu sa odredbama članova 53. i 116. Zakona o vodama, člana 12. i 13. Pravilnika o sadržaju, obliku, uvjetima načinu izdavanja i čuvanja vodnih akata i odredbama člana 3. tačka s) i članova 14., 19. i 20. Uredbe o uslovima ispuštanja otpadnih voda u okoliš i sisteme javne kanalizacije.

Tačka 4. dispozitiva rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada („Službene novine Federacije BiH“, broj 92/07, 46/09, 79/11 i 88/12) i Odlukom o visini posebnih vodnih naknada („Službene novine Federacije BiH“, broj 46/07).

Na osnovu provedenog postupka konstatuje se da je podnosilac zahtjeva, "HIFA-PETROL" d.o.o. Sarajevo, PJ Živinice 2, ispunio minimum uslova za izdavanje vodne dozvole za ispuštanje oborinskih onečišćenih voda te je riješeno kao u dispozitivu ovog rješenja.

Podnosilac zahtjeva je, na ime izdavanja ovog vodnog akta, izvršio uplatu federalne pristojbe iz tar. br. 43. Zakona o federalnim upravnim pristojbama i Tarife federalnih upravnih pristojbi («Službene novine Federacije BiH», br. 6/98, 8/00, 45/10 i 43/13).

#### **Uputa o pravnom lijeku:**

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Obrađivač akta:

Behija Ahmedić, dipl.inž.tehn.

**Po ovlaštenju**

**Rukovodilac sektora za izdavanje vodnih akata**



**Haris Ališehović, dipl.inž.građ.**

Dostaviti:

- "HIFA-PETROL" d.o.o. Sarajevo, ul. Hotonj bb, Vogošća, Sarajevo
- AVP Sava, ISV-vodna knjiga
- Org.jed. 50
- ④ Org.jed. 40-arhiva
- Oglasna tabla AVP Sava Sarajevo